

四庫全書

集部

欽定四庫全書

集部

石倉歷代詩選卷八

詳校官庶吉士_臣范逢恩

侍讀_臣孫球覆勘

總校官進士_臣朱鈐

校對官中書_臣嵇承志

謄錄監生_臣秦在東

欽定四庫全書

石倉歷代詩選卷八

明 曹學佺 編

梁詩二

任昉

字彥昇樂安博昌人

奉和登景陰山

物色感神遊
升高悵有閑
南望銅駝街
北走長楸埭
別澗宛滄溟
疏山駕瀛碣
春鯨吐華浪
司南動輕柂
日下

重門照雲開九華徹觀閣隆舊恩奉圖愧前哲

贈郭桐廬出谿口見候余既未至郭仍進村維
舟久之郭生方至

朝發富春渚蓄意忍相思涿令行春返冠蓋溢川坻望
久方來萃悲歡不自持滄江路窮此湍險方自茲疊嶂
易成響重以夜猿悲客心幸自弭中道遇心期親好自
斯絕孤遊從此辭

贈徐徵君

促生悲永路早交傷晚別自我隔容徽於焉徂歲月情
非山河阻意似江湖悅東臯有儒素香與紫名絕曾是
違賞心曷用箴余缺眇焉追平生塵書廢不閱信此伊
能已懷抱豈暫輟何以表相思貞松擅嚴節

別蕭諮議

離燭有窮輝別念無終緒岐言未及申離目已先舉揆
景巫衡阿臨風長揪浦浮雲難嗣音徘徊悵誰與儻有
關外驛聊訪狎鷗渚

古意

青絲控燕馬紫艾飾吳刀朝風吹錦帶落日映珠袍
陸離關右客照耀山西豪雖非學詭遇終是任逢遭
人生會有死得處如鴻毛寧能偶鷄鶩寂寞隱蓬蒿

王僧孺

東海
郟人

中川長望

長川杳難即四望渺無極安流寧可值憤風方未息危
帆渡中懸孤光巖下晃岝嶬際樹難辨雲中鳥易識莫恨

東復西誰知迂且直故鄉相思者當春愛顏色獨寫千
行淚誰同萬里憶

詠擣衣

足傷金管遽多愴緹光促露團池上紫風飄庭裏綠下
機驚西眺鳴砧遽東旭芳汗似蘭湯彫金辟龍燭散度
廣陵音摻寫漁陽曲別鶴悲不已離鸞斷還續尺素在
魚腸寸心憑雁足

與司馬治書同聞鄰婦夜織

洞房風已激長廊月復清
鵲鵲夜庭廣飄飄曉帳輕
雜間百蟲思偏傷一鳥聲
鳥聲長不息妾心復何極
猶恐君無衣夜夜當窓織

夜愁示諸賓

簷露滴為珠池水合成壁
萬行朝淚瀉千里夜愁積
孤帳閉不開寒膏盡復益
誰知心眼亂看朱復成碧

秋閨怨

斜光隱西壁暮雀上南枝
風來秋扇屏月出夜燈吹
深

心起百際遙淚非一垂徒勞妾辛苦終言君不知

詠寵姬

及君高堂還值妾妍粧罷曲房褰錦帳迴廊步珠屣玉
釵時可挂羅襦詎難解再顧連城易一笑千金買

春思絕句

雪罷枝即青冰開水便綠復聞黃鳥聲全作相思曲

為徐僕射妓作

日晚應歸去上客強盤桓稍知玉釵重漸見羅襦寒

張率

字士簡
吳郡人

遠期

遠期終不歸節物坐將變白露愴單衣秋風息團扇誰
能久別離他鄉且異縣浮雲蔽重山相望何時見寄言
遠期者空閨淚如霰

長相思二首

長相思久離別美人之遠如雨絕獨延佇心中結望雲
雲去遠望鳥鳥飛滅空望終若斯珠淚不能雪

長相思久別離所思何在若天垂鬱陶相望不得知玉
階月夕映羅帷風夜吹長思不能寢坐望天河移

柳惲

字文暢河東解人

江南曲

汀洲採白蘋日暖江南春洞庭有歸客瀟湘逢故人故
人何不返春花復應晚不道新知樂祇言行路遠

長門怨

玉壺夜悵悵應門重且深秋風動桂樹流月搖輕陰綺

簷清露溼網戶思蟲吟歎息下蘭閣含愁奏雅琴何由
鳴曉佩復得抱宵衾無復金屋念豈照長門心

度關山

少長倡家女出入燕南垂惟持德自美本以容見知舊
聞關山遠何事總金羈妾心日已亂秋風鳴細枝

起夜來

城南斷車騎閣道覆青埃露華光翠網月影入蘭臺洞
房且莫掩應門或復開颯颯秋桂響非君起夜來

獨不見

別島望雲臺天淵臨水殿芳草生未積春花落如霰出
從張公子還過趙飛燕奉帚長信宮誰知獨不見

贈吳均三首

寒雲晦滄洲奔潮溢南浦相思白露亭永望秋風渚心
知別路長誰謂若燕楚關侯日遼絕如何附行旅願作
野飛鳥飄然自輕舉

遠遊濟伊洛秣馬渡清漳邯鄲饒美女艷色含春芳鼓

瑟未成曲踏屣復翔翔我本遊客子情愛在淮陽新知
誰不樂念舊苦人腸

夕宿飛狐關晨登磧磔坂形為戎馬倦思逐征旗遠邊
城秋霰來寒鄉春風晚始信隴雪輕漸覺寒雲卷徭役
命所當念子加餐飯

雜詩

雲輕暮色轉草綠晨芳歸山墟罷寒晦園澤閨朝暉春
心多感動睹物情復悲自君之去矣蘭堂罷鳴機徒知

遊宦是不念別離非

七夕穿針

代馬秋不歸，綈紈無復緒。
迎寒理衣縫，映月抽纖縷。
的皪愁睇光，連娟思眉聚。
清露下羅衣，秋風吹玉柱。
流陰稍已多，餘光欲誰與？

擣衣詩五首

孤衾引紛緒，獨枕愴憂端。
深庭秋草綠，高門白露寒。
思君起清夜，促柱奏幽蘭。
不怨飛蓬苦，徒傷蕙草殘。

行役滯風波游人淹不歸亭臯木葉下隴首秋雲飛寒
園夕鳥集思牖草蟲悲嗟矣當春服安見禦冬衣

鶴鳴勞永嘆採葦傷時暮念君方遠遊望妾理紈素秋
風吹綠潭明月懸高樹佳人飾淨容招攜從所務

步櫚杳不極離堂繭已扃軒高夕杵散氣爽夜碪鳴瑤
華隨步響幽蘭逐袂生踟躕理金翠容與納宵清

泛艷迴烟綵淵旋龜鶴文淒淒合歡袖冉冉蘭麝芬不
怨杼軸苦所悲千里分垂泣送行李傾首遲歸雲

庾肩吾

字子慎
新野人

有所思

佳人遠于隔乃在天一方
望望江山阻悠悠道路長
別前秋葉落別後春花芳
雷嘆一聲響雨淚忽成行
悵望情無極傾心還自傷

洛陽道

微道臨河曲層城傍洛川
金門纔出柳桐井半含泉
日
起果愚外車迴雙闕前
潘生時未返遙心徒眷然

賦得橫吹曲長安道

桂宮連複道黃山開廣路遠聽平陵鐘遙識新豐樹合
殿生光彩離宮起烟霧日落歌吹還塵飛車馬度

侍宴應令

副君時暇豫曾城聊近遊清池寫飛閣踈樹出龍樓北
陸冰方壯西園春欲周梅心芳屢動蒲節促難抽徒然
欣竝命無以廁應劉

侍宴餞張孝總應令

層臺臨迴漲耿耿晴烟上欲送分符人翻似河隄望寒
雲暗積水秋雨蒙重嶂別念動神襟華文切離貺慙無
寡和曲空陪郢中唱

三日侍蘭亭曲水宴

策星依夜動鑾駕總朝遊旌門臨苑樹相風出鳳樓春
生露泥泥天覆雲油油桃花舒玉澗柳葉暗金溝楔川
分曲洛帳殿掩芳洲踴躍頽魚出參差絳棗浮百戲俱
臨水千鍾共逐流

從皇太子出玄圃應令

春光起麗譙
屣步陟山椒
閣影臨飛蓋
鴈鳴入洞簫
水還登故渚
樹長蔭前橋
綠荷生綺葉
丹藤上細苗
顧循慙振藻
何用擬瓊瑶

山池應令

閨苑秋光暮
金塘收潦清
荷低芝蓋出
浪涌燕舟輕
逆湍流棹唱
帶谷聚笳聲
野竹交臨浦
山桐迴出城
水逐雲峰闥
寒隨殿影生

遊甌山

平子去已久餘風今復追未必遊春草王孫自不歸路
高村反出林長鳥更稀寒雲間石起秋葉下山飛西河
方閱訓詁得解朝衣

尋周處士弘讓

試逐赤松遊披林對一丘梨紅大谷晚桂白小山秋石
鏡菱花發桐門琴曲愁泉飛疑度雨雲積似重樓王孫
若不去山中定可留

詠同泰寺浮圖

望園臨柰苑王城對鄴宮
還從飛閣內遙見岷山中天
衣疑拂石鳳翅欲凌空
雲霓猶帶雨蓮井不生桐
盤承雲表露鈴搖天上風
月出琛含采天晴幡帶虹
周星疑更落漢夢似今通
我后情初照不與伊川同
方應捧馬出永得離塵蒙

賽漢高廟

昔在唐山曲今承紫貝壇
寧知臨楚岫非復望長安
野

曠秋先動林高葉早殘塵飛遠騎沒日徙半峰寒徒然
仰成誦終用試才難

經陳思王墓

公子獨憂生丘壠擅餘名採樵枯樹盡犁田荒墜平寧
追宴平樂詎想謁承明旦余來錫命兼言事結成飄颻
河朔遠颭颭颭風鳴雁與雲俱陣沙將蓬共驚枯桑落
古社寒鳥歸孤城隴水哀葭曲漁陽慘鼓聲離家來遠
客安得不傷情

過建章故臺

魯國觀遺殿韓城想舊臺
仲宣原隰滿子建悲風來
夏蓮猶反植秋窗尚左開
圖雲仍溜雨畫水即生苔
及君歡四望知余念七哀

和劉明府觀湘東王書

陳王擅書府河間富典墳
五車方累篋七閣自連雲
松葉芳帙氣栢燠起厨文
羽陵青簡出矯泉綠字分
方因接遊聖暫得奉朝聞
峰樓霞早發林殿日先曛
洛城復

接限歸軒畏後羣

奉和春夜應令

春牖對芳洲
珠簾新上鉤
燒香知夜漏
刻燭驗更籌
天禽下北閣
織女入西樓
月皎疑非夜
林疎似更秋
水光懸蕩壁
山翠下添流
詎假西園讌
無勞飛蓋遊

奉和太子納涼梧下應令

北園涼氣早
步輦暫逍遙
避暑日交長
扇迎風列短
簫山帶彈琴曲
桐橫棲鳳條
懸門開溜水
錦石鎮浮橋
黑米

生菰葉青花出
稻苗無因學仙
藻雲氣徒飄颻

詠美人

絳樹及西施俱是好容儀
非關能結束本是細腰肢
鏡前難竝照相將映淥池
看妝畏水動斂袖避風吹
轉手齊裾亂橫簪歷鬢垂
曲中人未取誰看白日移
不分他相識惟聽使君知

餞張孝總應令

江上早寒生
蕭條饒管清
別筵開帳殿
離舟卷幔城
前

山黃葉起對岼白沙驚臨渦同極望竊吹愧才輕

贈周處士

九丹開石室三徑投荒林仙人翻可見隱士更難尋
籬下黃花菊丘中白雪琴方欣松葉酒自和遊山吟

詠美人看畫應令

欲知畫能巧喚取真來映竝出似分身相看如照鏡
安釵等疎密著領俱周正不解平城圍誰與丹青競

和望月

桂殿月偏來留光引上才圓隨漢東蚌暈逐淮南灰渡
河光不濕移輪轍詎開此夜臨清景還承終宴杯

和徐主簿望月

樓上徘徊月窗中愁思人照雪光偏冷臨花色轉春星
流時入暈桂長欲侵輪願以重光曲承君歌扇塵

七夕

玉匣卷懸衣針樓開夜扉姮娥隨月落織女逐星移離
前忿促夜別後對空機倩語雕陵鵲填河未可飛

和晉安王詠燕

可憐幕上燕差池弄羽衣
夜夜同巢宿朝朝相對飛
銜泥瞻樂善相賀奉英徽
秋蟬行寂寞戀此未辭歸

春宵

征人別來久年芳復臨牖
燭下夜縫衣春寒偏著手
願及歸飛雁因書寄高柳

冬曉

鄰雞聲已傳愁人竟不眠
月光侵曙後霜明落曉前
紫

鬟起照鏡誰忍插花鈿

詠長信宮中草

委翠似知節含芳如有情
全由履迹少併欲上階生

賦得池萍

風翻乍青紫浪起時疎密
本欲嘆無根還驚能有實

吳均

字叔庠吳興故章人

戰城南

蹀躞青驪馬往戰城南
畿五歷魚麗陣三入九重圍
名

惜武安將血汙秦王衣為君意氣重無功終不歸

入關

羽檄起邊庭烽火亂如螢是時張博望夜赴交河城馬
頭要落日劒尾掣流星君恩未得報何論身命傾

梅花落

終冬十二月寒風西北吹獨有梅花落飄蕩不依枝流
連逐霜彩散漫下冰澌何當與春日共映芙蓉池

從軍行

男兒亦可憐立功在北邊
陣頭橫却月馬腹帶連錢
懷戈發隴坻乘凍至遼川
微誠君不愛終自直如弦

胡無人行

劍頭利如芒恒持照眼光
鐵騎追驍虜金羈討黠羌
高秋八九月胡地早風霜
男兒不惜死破膽與君嘗

雉朝飛操

二月雉朝飛橫行傍壠歸
斜看水外翟側聽嶺南顰蹙
蹠恒欲戰耿耿恃彊威
當令君見賞何辭碎錦衣

妾安居

賤妾先有寵蛾眉進不遲一從西北麗無復城南期何
因暫艷逸豈為乏妍姿徒有黃昏望寧遇青樓時惟惜
應門掩方餘永巷悲匡牀終不共何由橫自私

陌上桑

娟娟陌上桑蔭陌復垂塘長條映白日細葉隱鸝黃蠶
饑妾復思拭淚且提筐故人寧知此離恨煎人腸

秦王卷衣

咸陽春色芳秦帝卷衣裳玉簡茱萸匣金泥蘇合香初
芳薰複帳餘輝耀玉牀當須晏朝罷持此贈華陽

攜手曲

艷喬陽之春攜手清洛濱雞鳴上林苑薄暮小平津長
裾藻白日廣袖帶芳塵故交一如此新知詎憶人

行路難五首

洞庭水上一株桐經霜觸浪困嚴風昔時抽心耀白日
今旦卧死黃沙中洛陽名工見咨嗟一剪一刻作琵琶

白壁規心學明月珊瑚映面作風花帝王見賞不見忘提
攜把握登建章掩抑摧藏張女彈殷勤促柱楚明光年
年月月對君子遙遙夜夜宿未央未央綵女棄鳴篳爭
先拂拭生光儀茱萸錦衣玉作匣安念昔日枯樹枝不
學衡山南嶺桂至今千載猶未知

青瑣門外安石榴連枝接葉夾御溝金墉城西合歡樹
垂條照綵拂鳳樓遊俠少年游上路傾心傾倒想戀慕
摩頂至足買片言開胸瀝膽取一顧自言家在趙邯鄲

翩翩舌杪復劒端青驪白駮的盧馬金羈綠鞵紫絲鞵
蹀躞橫行不肯進夜夜汗血至長安長安城中諸貴臣
爭貴儒者席上珍復聞梁王好學問輕棄劒客如埃塵
吾丘壽王始得意司馬相如適被申大才大辯尚如此
何況我輩輕薄人

君不見西陵田從橫十字成陌阡君不見東郊道荒涼
蕪沒起寒烟盡是昔日帝王處歌姬舞女達天曙今日
翩妍少年子不知華盛落前去吐心吐氣與他人今旦

迴惑生猶豫山中桂樹自有枝心中方寸自相知何言
歲月忽若馳君之情意與我離還君玳瑁金雀釵不忍
見此使心危

君不見長安客舍門倡家少女名桃根貧窮夜紡無燈
燭何言一朝奉至尊至尊離宮百餘處千門萬戶不知
曙惟聞啞啞城上烏玉欄金井牽轆轤丹梁翠柱飛流
蘇香薪桂火炊雕胡當年翻覆無常定薄命為女何必

君不見上林苑中客冰羅霧縠象牙席盡是得意忘言
者探腸見膽無所惜白酒甜鹽甘如乳綠觴皎鏡華如
碧少年持名不肯嘗安知白駒應過隙博山鑪中百和
香鬱金蘇合及都梁逶迤好氣佳容貌經過青鎖歷紫
房已入中山馮后帳復上皇帝班姬牀班姬失寵顏不
開奉帚供養長信臺日暮耿耿不能寐秋風切切四面
來玉階行路生細草金爐香炭變成灰得意失意須臾
頃非君方寸逆所裁

王侍中夜集

抽蘭開石路剪竹製山扉
文淪見綠水參差隱翠微
西山採藥至東都謝病歸
紡毛織野服縫芰作山衣
欲知三青鳥簷上素雲飛

登鍾山燕集望西靜壇

客思何以緩春郊滿初律
高車陸離至駿騎差池出
寶椀汎蓮花珍杯食竹實
才勝商山四文高竹林七
復望子喬壇金繩蘊綠帙
風雲生屋宇芝映被仙室
方隨鳳

鳳去悠然駕白日

與柳惲相贈答

黃鸝飛上苑綠芷出汀洲日映昆明水春生鵲樓飄
颻白花舞瀾漫紫萍流書織迴文錦無因寄隴頭思君
甚瓊樹不見方離憂

鳴鞭適大阿聯翩渡漳河燕姬及趙女挾瑟夜經過纖
腰曳廣袖半額畫長蛾客本倦遊者箕帚在江沱故人不
可棄新知空復何

答柳惲

清晨發隴西日暮飛狐谷
秋月照層嶺寒風掃高木
霧露夜侵衣關山曉催軸
君去欲何之參差間原陸
一見終無緣懷悲空滿目

贈任黃門

相如體英彥左右生容輝
已紆漢帝組復解梁王衣
經過雲母扇出入千門扉
連洲茂芳杜長門鬱翠微
欲言終未敢徒然獨依依

酬周參軍

日暮憂人起倚戶
悵無懽水傳洞庭遠
風送雁門寒江
南霜雪重相如衣服單
沈雲隱喬樹細雨滅層巒
且當對樽酒朱絃永夜彈

贈朱從事

我行欲何之千里尋膠漆
長葭歷渚生疎蒲綠岝出裊
裊能隨風離離堪度日
客思已飄蕩相思復非一
未得叙殷勤先作數行泣

贈搖郎

星漢正參差佳人不在斯宿昔暫乖阻何異遠分離露
染薜蘿葉日照茝蘭枝風光已飄薄雲采復逶迤勞夢
無人覺默默心自知

發湘州贈親故別

相送出江潯淚下沾衣襟何用叙離別臨歧贈好音敬
通才如此君山學復深明哲遂無賞文華空見沈古來
非一日無事更勞心

同柳吳興何山集送劉餘杭

王孫重離別置酒峰之畿
逶迤川上草參差澗裏薇
輕雲紉遠岫細雨沐山衣
簷端水禽息窗上野螢飛
君隨綠波遠我逐清風歸

送柳吳興竹亭集

平原不可望波瀾千里直
夕魚汀下戲暮雨簷中息
白雲時去來青峰復負側
躑躅牛羊下晦昧崦嵫色
王孫猶未歸且聽西光匿

初至壽春作

桓譚不賣交
馮子任紆直
浮沈逐波影
飄揚恣風力
北州少知舊
南陽寡相識
中駕每傾輪
當騫復摧翼
望美無津梁
私自憐何極

入蘭臺贈王治書僧孺

故人揚子雲
校書麟閣下
寂寞少交遊
紛綸富文雅
予為隴西使
寓居洛陽社
相思非不深
行行避驄馬

酬聞人侍郎別

悵人心不樂，萬里向悠悠。
凌朝憇枉渚，薄暮遵江洲。
君住青門上，我發霸陵頭。
相思自有處，春風明月樓。
整棹北川湄，回首望城邑。
林疎風至少，山高雲度急。
共懷萬里心，各作千行泣。
欲見終無緣，思君空佇立。

贈鮑春陵別

落葉思紛紛，蟬聲猶可聞。
水中千丈月，山上萬重雲。
海鴻來倏去，林花合復分。
所憂別離意，白露下霑裙。

春詠

春從何處來拂水復驚梅
雲障青瑣闥風吹承露臺
美人隔千里羅幃閉不開
無由得共語空對相思杯

何遜

字仲言東海郊人

銅雀妓

秋風木葉落蕭瑟管絃清
望陵歌對酒向帳舞空城
寂寂簷宇曠飄飄帷幔輕
曲終相顧起日暮松柏聲

擬輕薄篇

城東美少年重身輕萬億
柘彈隨珠九白馬黃金飾
長

安九達上青槐蔭道植穀擊晨已喧肩排暝不息走狗
通西望牽牛亘南直相期百戲傍去來三市側象牀杳
繡被玉盤傳綺食倡女掩歌扇小婦開簾織相看獨隱
笑見人還斂色黃鵠悲故羣山枝詠新識鳥飛過客盡
雀聚行龍匿酌羽方厭厭此時懽未極

望解前水竹答崔錄事

蕭蕭叢竹映澹澹平湖淨葉倒漣漪文水漾檀欒影相
思不會面相望空延頸遠天去浮雲長墟斜落景幽疴

與歲積賞心隨事屏鄉念一遭迴白髮生俄頃

暮秋答朱記室

游揚日色淺騷屑風音勁寒潭見底清風色極天淨寸
陰坐銷鑠千里長遼迴桃李爾繁華松柏余本性故心
不存此高文徒可詠

酬范記室雲

林密戶稍陰草滋堦欲暗風光蓋上輕日色花中亂相
思不獨懽佇立空為歎清談莫共理繁文徒可玩高唱

子自輕繼音予可憚

落日前墟望贈范廣州雲

緣溝綠草蔓扶援雜華舒輕煙澹柳色重霞映日餘遙
遙長路遠寂寂行人疎我心懷碩德思欲命輕車高門
盛遊侶誰肯進畋漁

道中贈桓司馬季珪

晨纜雖同解晚洲阻共入猶如征鳥飛差池不可及本
願申羈旅何言異翔集君渡北江時詎令南浦泣

夕望江橋示蕭諮議楊建康江主簿

夕鳥已西度殘霞亦半消
風聲動密竹水影漾長橋
旅人多憂思寒江復寂寥
爾情深顰洛予念返漁樵
何因適歸願分路一揚鑣

寄江州褚諮議

自與君別離四序紛迴薄
分手清江上念別猶如昨
追憶邊城遊奚尋平生樂
俱登巖嶺共坐逶迤閣
清吹或忘歸繁文時間作
連鑣戲淺草遊幘導長薄
五載同

衣裘一朝異睽索夫君頗留滯駢未沃若早秋正悽
愴餘暉晚銷鑠林葉下仍飛水花披未落如何隔千里
無由舉三爵因君奏采蓮為余吟別鶴

贈諸遊舊

弱操不能植薄伎竟無依淺智終已矣今名安可希擾
擾從役倦屑屑身事微少壯輕年月遲暮惜光輝一塗
今未是萬緒昨如非新知雖已樂舊愛盡睽違望鄉空
引領極目淚沾衣旅客長憔悴春物自芳菲岼花臨水

發江燕遶檣飛無由下征帆獨與暮潮歸

秋夕仰贈從兄寘南

堦蕙漸翻葉池蓮稍罷花高樹北風響空庭秋月華寸
心懷是夜寂寂漏方賒撫弦乏歡娛臨觴獨歎嗟悽愴
戶涼入徘徊欄影斜無為淹戚里見就還田家

南還道中送贈劉諮議別

一官從府役五稔去京華遽逐春流返歸帆得望家天
末靜波浪日際斂煙霞岼薺生寒葉村梅落早花遊魚

上急水獨鳥赴行楂目想平陵柏心憶青門爪曲陌背
通垣長墟抵狹斜善鄰談穀稼故老述桑麻寢興從閒
逸視聽絕喧譁夫君日高興為樂坐驕奢室墮傾城佩
門交接懣車入塞長雲雨出國暫泥沙握手分岐路臨
川何怨嗟

與沈助教同宿湓口夜別

我為潯陽客戒旦乃西遊君隨春水駛雞鳴亦動舟共
泛湓之浦旅泊次城樓華燭已消半更人數唱籌行者

從此別去去不淹留

與蘇九德別

宿昔夢顏色咫尺思言偃何況杳來期各在天一面踟
躇暫舉酒倏忽不相見春草似青袍秋月如團扇三五
出重雲當知我憶君萋萋若被逕懷抱不相聞

贈韋記室黯別

故人儻送別停車一水東去帆若不見試望白雲中促
膝今何在銜杯誰復同水夜看初月江晚泝歸風無因

生羽翰千里暫排空

渡連圻

此山多靈異峻岨實非恒
湫流自洄糾激瀨視奔騰
懸崖抱奇崛絕壁駕峻嶒
磳礧上爭險岵嶇下相崩
百年積死樹千尺掛寒藤
詭怪終不測迴沈意難登
願欲書間見聊以寄親朋

下方山

寒鳥樹間響落星川際浮
繁霜白曉岼苦霧黑晨流
鱗

鱗逆去水瀾瀾急還舟望鄉行復立
瞻途近更脩誰能
百里地縈繞千端愁

春夕早泊和劉諮議落日望水

旅人嗟倦遊結纜坐春洲日暮江風靜中川聞棹謳
草光天際合霞影水中浮單艫時向浦獨櫂乍乘流
變童泣垂釣妖姬哭盪舟客心自有緒對此空復愁

嘲劉郎

房櫳滅夜火窗戶映朝光妖女褰帷去踐蹠初下牀
雀

釵橫曉鬢蛾眉艷宿妝稍聞玉釧遠猶憐翠被香寧知
早朝客差池已雁行

詠照鏡

朱簾旦初捲綺機晨未織玉匣開鑑影寶臺靜臨飾對
影獨含笑看花時轉側聊為出顰眉試染天桃色寶釵
若可間金鈿畏相逼蕩子行未歸啼妝坐沾臆

擬青青河畔草轉韻體爲人作其人識節工歌
春蘭日應好折花望遠道秋夜苦復長抱枕向空牀吹

臺下促節不言於此別歌筵掩團扇何時一相見絃絕
猶依軫葉落纔下枝即此雖云別方我未成離

學古二首

長安美少年羽騎暮連翩玉羈瑪瑙勒金絡珊瑚鞭陣
雲橫塞起赤日下城圓追兵待都護烽火望祁連虎落
夜方寢魚麗曉復前平生不可定空信蒼浪天

昔隨張博望辭帝長楊宮獨好西山勇思為北地雄十
年事河外雪鬢別關中季月邊秋重嚴野散寒蓬日隱

龍城霧塵起玉關風全孤君已復半菽我猶空欲因上
林雁一見平陵桐

春暮喜晴酬來戶曹苦雨

振衣喜初霽褰裳對晚晴落花猶未捲時鳥故餘聲春
芳空悅目游客反傷情鄉園不可見江水獨自清願得
同攜手歸望對都城

七夕

仙車駐七襄鳳駕出天潢月映九微火風吹百和香來

懽暫巧笑還淚已沾裳依稀如洛汭倏忽似高唐別離
未得語河漢漸湯湯

詠早梅

兔園標物序驚時最是梅銜霜當路發映雪擬寒開枝
橫卻月觀花繞凌風臺朝洒長門泣夕駐臨邛杯應知
早飄落故逐上春來

塘邊見古塚

行路一孤墳路成墳欲毀空疑年代積不知陵谷徙幾

逢秋葉黃驟見春流瀾金蠶不可織玉樹何時盡陌上
驅馳人笑歌自侈靡今日非明日所念誰憐此

登禪岡寺望和虞記室

南望南郭門拱樹稍雲密北窗北溱道重樓霧中出接
樹隱高蟬交枝承落日光陰不可捨懷抱何由悉

答高博士

北窗涼夏首幽居多卉木飛鯁弄晚花清池映疎竹為
宴得快性安閒聊鼓腹將子厭囂塵就予開耳目

贈王左丞

欄外鶯啼罷園裏日光斜游魚亂水葉輕燕逐風花長
墟上寒靄曉樹沒歸霞九華暮已隱抱鬱徒交加

敬酬王明府

星稀初可見月出未成光澄江照遠火夕霞隱連樯賤
軀臨不測玉體畏垂堂念別已零淚況乃思故鄉

日夕出富陽浦口和朗公

客心愁日暮徙倚空望歸山煙涵樹色江水映霞暉獨

鶴凌空逝雙鳬出浪飛故鄉千餘里茲夕寒無衣

臨行與故游夜別

歷稔共追隨一旦辭羣匹復如東注水未有西歸日夜
雨滴空堦曉燈暗離室相悲各罷酒何時同促膝

與胡興安夜別

居人行轉軼客子暫維舟念此一筵笑分為兩地愁露
濕寒塘草月映清淮流方抱新離恨獨守故園秋

見征人分別

淒淒日暮時親賓俱竚立
征人拔劍起兒女牽衣泣
候騎出蕭關追兵赴馬邑
且當橫行去誰論裹屍入

看伏郎新婚

霧夕蓮出水霞朝日照梁
何如花燭夜輕扇掩紅妝
良人復灼灼席上自生光
所悲高駕動環珮出長廊

詠娼婦

曖曖高樓暮華燭帳前明
羅帷雀釵影寶瑟鳳雛聲
庭花枝上發新月霧中生
誰念當窗牖相望獨盈盈

詠春雪寄族人治書思澄

可憐江上雪迴風起復滅
本欲映梅花翻悲似玉屑
朝鶯日弄響暮條行可結
咸言不適時安知非矯節

邊城思

柳黃未吐葉水綠半含苔
春色邊城動客思故鄉來
爲人妾怨

燕戲還簷際花飛落枕前
寸君不見拭淚坐調絃
閨怨二首

竹葉響南窗月光照東壁誰知夜獨覺枕前雙淚滴
閨閣行人斷房櫳月影斜誰能北窗下獨對後園花

苑中見美人

羅袖風中捲玉釵林下耀團扇承落花復持掩餘笑

蕭子範

字景則齊高帝之孫

羅敷行

城南日半上微步弄妖姿含情動燕俗顧景笑齊眉不
憂桑葉盡還憶畏蠶饑春風若有顧惟願落花遲

春望古意

光景斜漢宮橫梁照采虹春情寄柳色鳥語出梅中氛
氲閨裏思逶迤水上風落花徒入戶何解妾牀空

望秋月

河漢東西陰清光此夜出入帳華珠被斜筵照寶瑟霜
慘庭上蘭風鳴簷下橘獨見傷心者孤燈坐幽室

夜聽雁

天月廣庭輝遊雁犯霜飛連翩辭朔氣嘹唳獨南歸夜

長寒復靜燈光暖欲微悽悽不可聽何況觸愁機

蕭子顯

字景暢
子範弟

代美女篇

邯鄲暫輟舞已姬請罷絃佳人淇水出艷趙復傾燕繁
穠既為李照水亦成蓮朝酤成都酒暝數河間錢餘光
幸未惜蘭膏空自煎

燕歌行

風光遲舞出青蘋蘭條翠鳥鳴發春洛陽梨花落如雪

河邊細草細如茵
桐生井底葉交枝
今看無端雙燕離
五重飛樓入河漢
九華閣道暗清池
遙看白馬津上吏
傳道黃龍征戍兒
明月金波徒照妾
浮雲玉葉君不知
思君昔去柳依依
至今八月避暑歸
明珠蠶繭勉登機
鬱金香蘂特香衣
洛陽城頭雞欲曙
丞相府中烏未飛
夜夢征人縫狐貉
私憐織婦裁錦緋
吳刀鄭綿絡寒閨
夜被薄芳年海上
水中見日暮寒夜
空城雀

春別三首

翻鶯度燕雙比翼楊柳千條共一色但看陌上攜手歸
誰能對此空相憶

江東大道日華春垂楊挂柳掃輕塵淇水昨送淚沾巾
紅妝宿昔已應新

銜悲攬涕別心知桃花李花任風吹本知人心不如樹
何意人別似花離

蕭子雲

字景喬
子顯弟

東郊望春訓王建安雋晚遊

金塘綠泉滿上園梨蕊落蛺蝶戀殘花黃鶯對妖萼芳
菲滿郊甸惠風生蘭薄子家冠蓋里我館幽棲郭綠楊
垂長溪便橋限清洛相去能幾許一水終疎索

贈海師遊甌山

真心好邱壑偏悅幽棲人忽聞甌山旅萬里自相親
泐寥晚霖霽重疊晴雲新秋至蟬鳴柳風高霧起塵動余
憶山思惆悵惜荷巾

落日郡西齋望海山

漁舟暮出浦，漢女採蓮歸。
夕雲向山合，水鳥望田飛。
蟬鳴早秋至，蕙草無芳菲。
故隱天山北，夢想日依依。

蕭子暉

字景光子
雲之弟

春宵

夜夜妾偏棲，百花含露低。
蟲聲繞春岼，月色思空閨。
傳語長安驛，辛苦密遼西。

冬曉

步欄光欲通，曙鳥向西東。
燭滅傳餘氣，帷香開曉風。
繁

花無處盡還銷寒鏡中

王籍

字文海琅邪臨沂人

櫂歌行

揚舲橫大江乘流任蕩蕩輕橈暮不息復逐夜潮上時
見湘水仙恒聞解佩響

入若邪溪

舳舻何汎汎空水共悠悠陰霞生遠岫陽景逐迴流蟬
噪林逾靜鳥鳴山更幽此地動歸念長年悲倦遊

王訓

字懷範
陳長子

度關山

邊庭多警急羽檄未曾閒
從軍出隴坂驅馬度關山
關山恒晻靄高峰白雲外
遙望秦川水千里長如帶
好勇自秦中意氣本豪雄
少年便習戰十四已從戎
昔年經上郡今歲出雲中
遼水深難渡榆關斷未通
折衝凌絕域流蓬警未息
胡風朝夜起平沙不相識
兵法貴先聲軍中自有程
逗遛皆贖罪先登盡一城
都護疲詔吏將

軍擅發兵平盧疑縱火飛鴟畏犯營輕重一為虜金刀
何用盟誰知出塞外獨有漢飛名

獨不見

日晚宜春暮風軟上林朝對酒近初節開樓蕩夜嬌石
橋通小澗竹路上青霄持底誰見許長愁成細腰

奉和率爾有詠

殿內多仙女從來難比方別有當窗艷復是可憐妝學
舞勝飛燕染粉薄南陽散黃分黛色薰衣雜棗香簡釵

新輶翠試履逆填牆一朝恃容色非復守空房君恩若
可恃願作雙鴛鴦

應令詠舞

新妝本絕世妙舞亦如仙傾腰逐韻管斂衽聽張絃袖
輕風易入釵重步難前笑態千金動衣香十里傳將持
比飛燕定當誰可憐

王筠

字元禮一字
德柔琅邪人

行路難

千門皆閉夜何央百憂俱集斷人腸探揣箱中取刀尺
拂拭機上斷流黃情人逐情雖可恨復畏邊遠之衣裳
已綵一罽催衣縷復擣百合薰衣香猶憶去時腰大小
不知今日身短長兩襠雙心共一抹柏複兩邊作八襠
襟帶雖安不忍縫開孔裁穿猶未達胸前却月兩相連
本照君心不照天願君分明得此意勿復流蕩不如先
含悲含怨判不死封情忍思待明年

和衛尉新渝侯巡城口號

閭闔暖已昏，鉤陳杳將暮。
棲鳥城上返，晚雀林中度。
屯衛時巡警，凝威肆安步。
閣道趨文昌，禁兵連武庫。
銅烏迎早風，金掌承朝露。
累愚分曉色，睥睨生秋霧。
維城任寄隆，空想靈均賦。
伊余方病免，丘園保恬素。

春日

菴苑心未發，薜蘿葉欲齊。
春蠶方曳緒，新燕正銜泥。
野雉呼雌雉，庭禽挾子棲。
從君客梁後，方晝掩春閨。
山川隔道里，芳草徒萋萋。

秋夜二首

九重依夜館四壁慘無暉
招搖顧西落烏鵲向東飛
流螢漸收火絡緯欲催機
爾時思錦字持製行人衣
所望丹心達嘉客倘能歸

露華初泥泥桂枝行悚悚
煞氣下重軒輕陰滿四屋別
寵增脩夜遠征悲獨宿愁
牽翠羽眉淚滿橫波目長門
絕往來含情空杼軸

遊望

落日照紅妝挾瑟當窗牖寧復歌薜蘿
惟聞歎楊柳結好在同心離別由衆口
徒設露葵羹誰酌蘭英酒會日杳無期
薜蘿華安得久

代牽牛答織女

新知與生別由來儻相值如何寸心中
一宵懷兩事歡娛未繾綣倏忽成離異
終日遙相望祇益生愁思猶想今春悲
尚有故年淚忽遇長河轉獨喜涼颼至
奔精翊鳳軫織阿警言龍轡

苦暑

日坂散朱霧天隅斂青靄飛颺煥南陸炎津通北瀨繁
星聚若珠密雲屯似蓋月至每開襟風過時解帶

五日望採拾

裁縫逗早夏點畫守初晨綃紉既妍媚脂粉亦香新長
絲表良節命縷應嘉辰結蘆同楚客採艾異詩人折花
競鮮彩拭露染芳津含嬌起斜盼斂笑動微顫獻璫依
洛浦懷珮似江濱須待恩光接中夜奉衣巾

奉酬從兄臨川桐樹

伊昔擅羽儀待價龍門垂優游清露點徽穆惠風吹月上陰陽榦雲覆死生枝公子存高尚聊用影華池棲鸞既不重舞鶴復何施方同散木爨清鄉音竟誰知

劉孝綽

字孝綽本名冉彭城人

夜聽妓賦得烏夜啼

鴟絃且輟弄鶴操暫停徽別有啼烏曲東西相背飛倡人怨獨守蕩子殊未歸忽聞生離唱長夜泣羅衣

銅雀妓

雀臺三五日弦吹似佳期
况復西陵晚松風吹總帷
危絃斷復續妾心傷此時
誰言留客袂還掩望陵悲

春日從駕新亭應制

旭日輿輪動言追河曲遊
紆餘出紫陌迤邐度青樓
前驅掩蘭徑後乘歷芳洲
春色江中滿日華巖上留
江風傳葆吹巖華映采旂
臨渦起睿作駟馬暫停輶
侍從榮前阮雍容慙昔劉
空然等彈翰非徒嗟未道

陪徐僕射晚宴

夫君追宴喜十日遞來過
築室華池上開軒臨芰荷
方塘交密篠對雷接繁柯
景移林改色風去水餘波
洛城雖半掩愛客待驪歌

太子湫落日望水

川平落日迴殘照滿川漲
復此淪波地派別引沮漳
耿耿流長脈熠熠動微光
寒鳥逐查漾饑鷗拂浪翔
臨泛自多美況乃還故鄉
榜人夜理檝擢女闇成妝
欲待春

江曙爭塗向洛陽

夕逗繁昌浦

日入江風靜安波似未流
岼迴知舳轉解纜覺船浮
暮烟生遠渚夕鳥赴前洲
隔山聞戍鼓傍浦喧棹謳
疑是辰陽宿於此逗孤舟

發建興渚示到陸二黃門

扁舟去平樂還顧極川梁
猶聞棗下吹尚識杏間堂
洛橋分曲渚官寺隱回塘
客行裁跬步即事已多傷
况復

千餘里悲心未遽央

歸沐呈任中丞昉

步出金華省還望承明廬壯哉宛洛地佳麗實皇居虹
蜺拖飛閣蘭芷覆清渠圓淵倒荷芰方鏡寫簪裾白雲
夏峰盡青槐秋葉疎自我從人爵蟾兔屢盈虛殺青徒
已汗司舉未云書文昌愧通籍臨邛幸第如夫君多敬
愛蟠木濫吹噓時時釋簿領騶駕入吾廬自唾誠礪砭
無以儷璠璣但願長閒暇酌醴薦焚魚

淇上戲蕩子婦

桑中始奕奕，淇上未湯湯。
美人要雜佩，上客誘明璫。
日暗人聲靜，微步出蘭房。
露葵不待動，鳴琴無暇張。
翠釵挂已落，羅衣拂更香。
如何嫁蕩子，春夜守空牀。
不見青絲騎，徒勞紅粉妝。

古意

燕趙多佳麗，白日照紅妝。
蕩子十年別，羅衣雙帶長。
春樓怨難守，玉階空自傷。
復此歸飛燕，銜泥繞曲房。
羞池

入綺幕上下傍雕梁故居猶可念故人安可忘相思昏
望絕宿昔夢容光魂交忽在御轉側定他鄉徒然顧枕
席誰與同衣裳空使蘭膏夜炯炯對繁霜

望月有所思

秋月始纖纖微光垂步簷腫臃入牀簾髣髴鑒窗簾
簾螢隱光息簾蟲映光纖玉羊東北上金虎西南長
門隔清夜高堂夢容色如何當此時懷情滿胸臆

劉孝儀

字子儀本名潛字
孝儀孝綽之弟

行過康王故第苑

入梁逢故苑度薛見餘宮尚識招賢閣猶懷愛士風
靈光一起遠衡館亦蒙籠洞門餘舊色甘棠留故藁
送禽悲不去過客慕難窮池竹徒如在林堂暖已空
遠橋隔樹出迴澗隱岼通芳流小山桂塵起大王風
具物咸如此是地感余衷空想陵前劒徒悲龍上童


帆渡吉陽洲

揚帆乘浪華搥鼓要風力近樹儻而遐遙山俄已逼欲

比驚龍掣手將頸陽鳥翼客行悲道遠惟須前路極

詠織女

金鈿已照曜白日未蹉跎欲待黃昏後含嬌渡淺河



石倉歷代詩選卷八

欽定四庫全書

集部

石倉歷代詩選卷十九

詳校官庶吉士臣范逢恩

侍讀臣孫球覆勘

總校官進士臣朱鈐

校對官中書臣嵇承志

謄錄監生臣秦在東

欽定四庫全書

石倉歷代詩選卷九

明 曹學佺 編

梁詩三

劉孝威

字孝威 孝勝之弟

隴頭水

從軍戍隴頭
隴水帶沙流
時觀胡騎飲
常為漢國羞
驚妻成兩劍
殺子祀雙鉤
頓取樓蘭頸
就解郅支裘
勿令

如李廣功多遂不酬

塘上行苦辛篇

蒲生伊何陳曲中多苦辛黃金坐銷鑠白玉遂縑磷裂
衣工毀嫡掩袖切讒新嫌成跡易已愛去理難申秦雲
猶變色魯日尚迴輪妾歌已腸斷君心終未親

怨詩

退寵辭金屋見譴斥甘泉枕席秋風起房櫳明月懸燭
避窗中影香迴爐上煙丹庭斜草徑素壁點苔錢歌起

蒲生曲樂奏下山絃新聲音廣宴餘杯今自傳王嬙向
絕漢宗女入祁連雁書猶未返角馬無歸年昭臺有媵
御曾坂無棄捐後薪隨復積前魚誰更憐

小臨海

碣石望山海留連降尊極秦帝枉鉤陳漢家增禮秩石
橋終不成桑田竟難測蜃氣遠生縷鮫人近潛織空勞
帝女填詎動波神色

思歸引

胡地憑良馬懷驕負漠恩甘泉烽火入回中宮室燔錦
車勞遠駕繡衣疲屢奔貳師已喪律都尉亦銷魂龍堆
求援急狐塞請先屯櫪下驅雙駿腰邊帶兩鞬乘障無
期限思歸安可論

妾薄命篇

去年從越障今歲沒胡塵嚴霜封碣石驚沙暗井陘玉
簪久落鬢羅衣長挂屏浴蠶思漆水條桑憶鄭垌寄書
朝鮮吏留釧武安亭勿言戎夏隔但令心契冥不見豐

城劍千祀復同形

行幸甘泉宮歌

漢家迎夏畢避暑甘泉宮
棧車鳴里鼓駟馬駕相風
校尉烏桓騎待制樓煩弓
後旌猶五柞前笳度九嶷
才人豹尾內御酒屬車中
輦迴百子閣扇動七輪風
鳴鐘休衛士披圖召後宮
材官促校獵涼秋戲射熊

擬古應教

雙棲翡翠兩鴛鴦
巫雲洛月乍相望
誰家妖冶折花枝

蛾眉曼睩使情移青鋪綠璫琉璃扉瓊筵玉筍金縷衣
美人年幾可十餘含羞轉笑斂風裾珠丸出彈不可追
空留可憐持與誰

蜀道難

玉壘高無極銅梁不可攀雙流逆巖道九坂澁陽關鄧
侯策馬度王生斂轡還斂轡懼身尤叱馭奉王猷若恡千金
重誰為萬里侯戲馬吞珠界揚舲濯錦流沈犀厭怪水
握鏡表靈丘禹山金碧有光輝遷亭車馬尚輕肥彌想

王褒擁節反更憶相如乘傳歸君平子雲閒不嗣江漢
英靈信已衰

三日侍皇太子曲水宴

二龍巡夏代八駿馭周朝豫遊光帝則樂飲盛民謠皇
儲導洛襖濫觴追灞橋掌祓開神籙司馬動鑾鑣周旗
交采眊晉鼓雜清簫旌宮臨廣隰藻衛爍巖椒蘭樽沿
曲岍靈若沂迴潮

登覆舟山望湖北

紫川通太液丹岑連少華堂皇更隱映松灌雜交加荇
蒲浮新葉漁舟繞落花浴童爭淺岼漂女擇平沙極望
傷春日迴車歸狹斜

出新林

却山眊洛邑函谷望秦京遙分承露掌遠見長安城故
鄉已可識遊子必勞情霧罷前林見風息涌川平坐觀
暮潮落漸見夕煙生無由一羽化徒想御風輕

侍宴賦得龍沙宵明月

鵲飛空繞樹月輪殊未圓嫦娥望不出桂枝稍隱殘落
照移樓影浮光動塹瀾櫪馬悲笳吹城烏啼塞寒傳聞
機杼妾愁余衣服單當秋絡已脆銜啼織復難斂眉雖
不樂舞劒強為歡請謝函關吏行當封一丸

苦暑

暮日苦炎溽遷坐接階廊月麗姮娥影星含織女光棲
禽動夜竹流螢出閨牆香盤糝鮮粉雕壺承玉漿白羽
徒垂握綠水自周堂弱紈猶覺重纖絺尚少涼弄風思

漢朔戲雨憶吳王
玄冰術難驗赤道漏猶長
誰能更吹律還令黍谷涼

奉和逐涼

鐘鳴夜未央避暑起徬徨
長河似曳素明星若散璫
倚巖欣石冷臨池愛水涼
月纖張敞畫荷妖韓壽香
對此遊清夜何勞娛洞房

春宵

花開人不歸節暖衣須變
迴釵挂反環拭淚繩春線
今

夜月輪圓胡兵必應戰

冬曉

妾家邊洛城慣識曉鐘聲
鐘聲猶未盡漢使報應行
天寒硯冰凍心悲書不成

九日酌菊酒

露花疑始摘羅衣似適薰
餘杯度不取欲持嬌使君
望隔牆花

隔牆花半隱猶見動花枝
當由美人摘詎止春風吹

賦得香出衣

香出衣步近氣逾飛
博山登高用鄴錦
含情動鷹比洛妃
香纓麝帶縫金縷
瓊花玉勝綴珠徽
蘇合故牽微恨歇
都梁路遠恐非新
猶賢漢君芳千里
尚笑荀令止三旬

劉孝先

孝威之弟

和兄孝綽夜不得眠

夜愁眠不安
起望臺南端
葉慘風聲異
樓空月色寒
笙

冷調簧數絃脆上琴難百年行詎幾萬慮苦相攢誰家
有明鏡暫借照心看

草堂寺尋無名法師

飛鏡點青天橫照滿樓前深林生夜冷複閣上宵煙葉
動花中露湍鳴閨裏泉竹風聲若雨山蟲聽似蟬摘果
仍荷藉酌水用花傳一卮聊自飲萬事且蕭然

和亡名法師秋夜草堂寺禪房月下

幽人住山北月上照山東洞戶臨松徑虛窗隱竹叢出

林避炎影步逕逐涼風平雲斷高岫長河隔淨空數螢
流暗草一鳥宿疎桐興逸煙霄上神閒宇宙中還思城
闕下何異處樊籠

劉遵

字孝陵

度關山

隴樹寒色落塞雲朝欲開谷深輦易響路狹幘難回當
知結綬去非是棄繻來行人思顧返道別且徘徊願度
關山鶴勞歌立可哀

相逢狹路間

春晚駕香車交輪礙狹斜所恐帷風入疑傷步搖花含
羞隱年少何因問妾家青樓臨上路相期竟路賒

從頓還城應令

漢水深難渡深潭見底清錦竿繫鳧舸珠竿懸翠旂鳴
笳芳樹曲流唱採蓮聲神遊不停駕日暮返連營寧顧
空房裏階下綠苔生

應令詠舞

倡女多艷色入選盡華年舉腕嫌衫重迴腰覺態妍情
繞陽春吹影逐相思弦履度開裙襦鬟轉匝花鈿所愁
餘曲罷為欲在君前

劉邈

彭城人

見人織聊為之詠

纖纖運玉指脉脉正蛾眉振躡開交縷停梭續斷絲
花初照月洞口垂朱帷弄機行掩淚翻令織素遲

秋閨

螢飛綺窗外妾思霍將軍燈前量獸錦簾下織花紋墜
露如輕雨長河似薄雲秋還百種事衣成未暇薰

陶弘景

字通明丹陽秣陵人

寒夜怨

夜雲生夜鴻驚悽切嘹唳傷夜情空山霜滿高煙平鉛
華沈照帳孤明寒月微寒風緊愁心絕愁淚盡情人不
勝怨思來誰能忍

詔問山中何所有賦詩以答

山中何所有嶺上多白雲只可自怡悅不堪持寄君

和約法師臨友人

我有數行淚不落十餘年今日為君盡併灑秋風前

曹景宗

字子震
新野人

光華殿侍宴賦競病韻

去時兒女悲歸來笳鼓競借問行路人何如霍去病

徐勉

字修仁東
海郊人

採菱曲

相攜及嘉月採菱渡北渚微風吹櫂歌日暮相容與采
采不能歸望望方延佇儻逢遺珮人預以心相許

昧旦出新亭渚

驅車凌早術山華映初日攬轡且徘徊復值清江謚杳
靄楓樹林參差黃鳥匹氣物宛如斯重以心期逸春堤
一遊行終朝意殊悉

徐悱

字敬業勉
之第二子

白馬篇

妍蹄飾鏤鞍飛鞚度河干少季本上郡遨遊入露寒劍
琢荆山玉彈把隨珠丸間有邊烽急飛候至長安然諾
竊自許捐軀諒不難占兵出細柳轉戰向樓蘭雄名盛
李霍壯氣勇彭韓能令石飲羽復使髮衝冠要功非汗
馬報效乃鋒端日沒塞雲起風悲胡地寒西征馘小月
北去腦烏丸歸報明天子燕然石復刊

贈內

日暮想青陽躡履出椒房網蟲生錦薦遊塵掩玉牀不

見可憐影空餘繡帳香彼美情多樂挾瑟坐高堂豈忘
離憂者向隅心獨傷聊因一書札以代九迴腸

劉峻

字孝標
平原人

自江州還入石頭詩

鼓枻入大川延睇洛城觀洛城何鬱鬱杳與雲霄半前
望蒼龍門斜瞻白鶴館槐垂御溝道柳綴金隄岝嶭馬
晨風趨輕輿流水散高歌梁塵下絃瑟荆禽亂我思江
海遊曾無朝市玩忽寄靈臺宿空發及關歎仲子入南

楚伯鸞出東漢何能栖樹枝取斃王孫彈

始居山營室

自昔厭諠囂執志好栖息嘯歌棄城市歸來事耕織鑿
戶闕嶠嶢開軒望漸淙激水簷前溜脩竹堂陰植香風
鳴紫鸞高梧巢綠翼泉脉同杳杳流波下不極髣髴玉
山隈想像瑤池側夜誦神仙記旦吸雲霞色將馭六龍
輿行從三鳥食誰與金門士撫心論胸臆

出塞

薊門秋氣清飛將出長城絕漠衝風急交河夜月明
陷敵縱金鼓摧鋒揚旆旌去去無終極日暮動邊聲

劉緩

平原人

江南可採蓮

春初北岼涸夏月南湖通
卷荷舒欲倚芙蓉生即紅
檝小宜迴徑船輕好入叢
釵光逐影亂衣香隨逆風
江南少許地年年情不窮

看美人摘薔薇

新花臨曲池佳麗復相隨
鮮紅同映水輕香共逐吹
繞架尋多處窺叢見好枝
矜新猶恨少將故復嫌萎
釵邊爛漫插無處不相宜

秋夜

樓上起秋風絕望秋閨中
燭溜花行滿香燃奩欲空
徒教兩行淚俱浮妝上紅

冬宵

別後春池異荷盡欲生
冰箱中剪刀冷臺上面脂凝
纖

腰轉無力寒衣恐不勝

陸倕

字佐公
吳郡人

和昭明太子鍾山解講

終南鄰漢闕高掌跨周京復此虧山嶺穹窿距帝城當
衢啓珠館臨下構山楹南望窮淮溆北眺盡滄溟步簷
時中宿飛階或上征網戶圖雲氣龕室畫仙靈副君憐
世網廣命萃人英道筵終后說鑾轡出郊坰雲峰響流
吹松野映風旌睿心嘉杜若神藻茂琳瓊多謝先成敏

空頌後乘榮

以詩代書別後寄贈

余本水鄉士閉門江海隅時逢世道泰蹇足步高衢門
成宦雖立效微功日疎入仕乘肥馬出守擁高車關門
遊昔吏遷亭有故書江派資賢牧宗英出建旗不勞王
布鼓無賴露田車弼政非責實求名已課虛長卿病猶
在修齡疾未祛詎知亭長肉寧挂府丞魚不能未知止
內訟慙諸已僊勉從王事纚舟出淮泗朋故遠追尋暝

宿清江陰明旦一分手翻飛各異林歸舟隨岝曲猶聞
歌棹音行者日超遠誰見別離心夕次洲岸明登慈
姥岑水流多迴復余歸良未尋江關寒事早夜露傷秋
草心屬姑蘇臺目送邯鄲道葭葦日蒼蒼親知慎早涼
劉兄消渴病休攝戒無良殷弟癩眩疾行止避風霜劉
侯有餘冷宜餌陟釐方伏子多風咳門冬幸易將率更
愛雅體體弱思自強吏曹勉玉潤諷議勗金相比部多
暇日奚用肆龍章建德何為者勿墮無人鄉記室朋從

暇露蛸附行商議曹坐朝罷尺板嗣徽芳雙栖成獨宿
俱飛忽異翔眷言思親友沈思結中腸追惟疇昔時朝
府多歡暇薄暮塵埃靜飛蓋遙相迓李郭或同舟潘夏
時方駕娛談終美景敷文永清夜促膝豈異人戚戚皆
朋婭今者一乖離漼然心事差山川望猶近便似隔天
涯玉躬子加護昭質余未虧八行思自勉一札望來儀

虞羲

字子陽
會稽人

自君之出矣

自君之出矣楊柳正依依君去無消息惟見黃鸝飛關
山多險阻士馬少光輝流年無止極君去何時歸

送友人上湘

濡足送征人褰裳臨水路共盈一樽酒對之愁日暮漢
廣雖容舫風悲未可渡佳期難再得但願論心故沅水
日生波芳洲行墜露共知丘壑改同無金石固

詠霍將軍北伐

擁旄為漢將汗馬出長城長城地勢險萬里與雲平涼

秋八九月虜騎入幽并飛狐白日晚瀚海愁雲生羽書
時斷絕刁斗晝夜驚乘墉揮寶劔蔽日引高旂雲屯七
萃士魚麗六郡兵胡笳關下思羌笛隴頭鳴骨都先自
誓日逐次亡精玉門罷斥堠甲第始修營位登萬庾積
功立百行成天長地自久人道有虧盈未窮激楚樂已
見高臺傾當今麟閣上千載有雄名

春郊

光風轉蕙晦香霧鬱蘭津暄遲蝶弄鶯景麗鳥和春樵

歌喧龍暮魚柹亂江晨山中芳杜若依依獨思人

江洪

濟陽人

採菱曲二首

風生綠葉聚波動紫莖開含花復含實正待佳人來
白日和清風輕雲雜高樹忽然當此時採菱復相遇

秋風曲

北牖風摧樹南籬寒蛩吟庭中無限月思婦夜鳴砧

胡笳曲

落日慘無光臨河獨飲馬颺颺夕風高聯翩飛雁下

詠歌姬

寶鑷間珠花分明靚妝點薄鬢約微黃輕紅澹鉛臉發
言芳已馳復加蘭蕙染浮聲易傷歎沈唱安而險孤轉
忽徘徊雙蛾乍舒斂不持全示人半用輕紗掩

和新浦侯詠鶴

閒園有孤鶴摧藏信可憐寧望春臯下刷羽翫花鈿何
時秋海上照影弄長川曉鳴動遙怨夕唳感孀眠哀咽

芳林右憫默華池邊猶冀拔雲志萬里共翩翩

費昶

江夏人

長門怨

向夕千愁起自悔何嗟及愁思且歸牀羅襦方掩泣絳
樹搖風軟黃鳥弄聲急金屋貯嬌時不言君不入

採菱曲

妾家五湖口採菱五湖側玉面不關妝雙眉本翠色日
斜天欲暮風生浪未息宛在水中央空作兩相憶

華觀省中夜聞城外擣衣

閭闔下重關丹墀吐明月秋氣城中冷秋砧城外發浮
聲繞雀臺飄響度龍闕宛轉何藏推當從上路來藏推
意未已定自乘軒裏乘軒盡世家佳麗似朝霞圓瑋耳
上照方繡領間斜衣薰百和屑鬢插九枝花昨暮庭槐
落今朝羅綺薄拂席捲鴛鴦開縵舒龜鶴金波正容與
玉步依砧杵紅袖往還縈素腕參差舉徒聞不得見獨
夜空愁佇獨夜何窮極懷之在心惻階垂玉衡露庭舞

相風翼瀝滴流星輝燦爛長河色三冬誠足用五日無
糧食楊雲已寂寥今君復弦直

和蕭記室春旦有所思

芳樹發春輝蔡子望青衣水逐桃花去春隨楊柳歸楊
柳何時歸裊裊復依依已蔭章臺陌復掃長門扉獨知
離心者坐惜春光違洛陽遠如日何由見宓妃

詠照鏡

晨暉照杏梁飛燕起朝妝留心散廣黛輕手約花黃正

釵時念影拂絮且憐香方嫌翠色故乍道玉無光城中
皆半額非妾畫眉長

庚丹

桂州刺史

秋閨有望

耿耿橫天漢飄飄出軸雲月斜樹倒影風至水迴文已
泣機中婦復悲堂上君羅襦曉長襖翠被夜徒薰空汲
銀牀井誰縫金縷裙所思竟不至持酒清夜分

夜夢還家

歸飛夢所憶共子汲寒漿銅瓶素絲綆綺井白銀牀雀
出丰茸樹蟲飛玳瑁梁離人不相見爭忍對春光

紀少瑜

字幼瑒
秣陵人

遊建興苑

丹陵抱天色紫淵更上林銀臺懸百仞玉樹起千尋水
流冠蓋影風揚歌吹音踟躕憐拾翠顧步惜遺簪日落庭
光轉方幙屢移陰終言樂未極不道愛黃金

擬吳均體應教

庭樹發春輝遊人競下機却匣擎歌扇開箱擇舞衣
桑萎不復惜看花遽將夕自有專城居空持迷上客

月中飛螢

遠度時依幕斜來如畏窗向月光還盡臨池影更雙

詠殘燈

殘燈猶未滅將盡更揚輝惟餘一兩焰纔得解羅衣

王臺卿

奉和望同泰寺浮圖

朝光正晃朗涌塔標千丈儀鳳異靈鳥金盤代仙掌積
拱成雕楠高簷挂珠網寶地若池沙風鈴如樹響刻削
生千變丹青圖萬象烟霞時出沒神仙乍來往晨霧
半層生飛幡接雲上游蛻不敢息翔鷗詎能仰讚善資
哲人流詠歸明兩願假舟航未彼岼誰云廣

奉和泛江

春江下白帝畫舸向黃牛錦纜迴沙磧蘭橈避荻洲濕
花隨水泛空巢逐樹流建平船梯下荆門戰艦浮岼社

多喬木山城足迴樓日落江風靜龍吟迴上遊

詠箏

依歌時轉韻按曲動花鈿促調移輕柱亂手度繁絃惟
有高秋月秦聲未可憐

李鏡遠

詠日

始臨東嶽觀俄升若木枝萍實詎儔彩合扇且慙規北
林耿初曜圓窗鑒早曦照庭餘雪盡映簷溜滴垂徘徊

匝花樹煜燭滿春池柳陰栽靡靡簾影復離離
曾泉豈亭舍桑榆忽在斯迴戈安得中長繩不可羈
冲情愛景落清宴惜光馳溫暉徒已荷深心竊自知

朱超道

朱超朱超道朱越各詩集所載名多互見疑是一人之作今從詩彙并載而於各題

下仍分註本
名以俟

別劉孝先 朱超道

疲疴積未瘳伏枕倦長愁復念夜分首江上值徂秋陰
凝變遠色落葉泛寒流繁霜積曉纜輕冰繞夜舟曳裾

出兔苑引領望龍樓勿念經臺側無為戚情遊

別席中兵

朱超道

數年共棲息一旦各聯翩莫論行近遠終是隔山川長
波漫不極高岫鬱相連急風亂還鳥輕寒靜暮蟬扁舟
已入浪孤帆漸逼天停車對空渚悵望轉依然

賦得蕩子行未歸

藝文作朱越玉
臺作朱超道

坐樓愁出望息意不思春無奈園中柳寒時已報人捉
梳羞理鬢挑朱懶向脣何當上路晚風吹還騎塵

詠孤石

朱超

侵霞去日近鎮水激流分對影疑雙闕孤生若斷雲過
風靜華浪騰烟起薄曛雖言近七嶺獨立不成羣

詠鏡

朱超道

折花須自插不用暫臨池當由可憐面偏與鏡相宜安
釵釧獨響刷鬢袖俱移惟餘心裏恨影中恒不知

詠獨栖鳥

朱超

河水聞寒已成凍塞草愁霜慙自衰可念無端失林鳥

此夜逆風何處歸
列網遮山不聽度
懸冰繞樹滑難依
細石似驚能隨雨
片木作鳶猶解機
但令積風多少便
何患有翼不能飛
寄語故林無數鳥
會入羣裏比毛衣

戴嵩

從軍行

長安夜刺閨胡騎
白銅鞮詔書發隴右
召募取關西劍
懸三尺鞘鎧累七重
犀督軍鳴戰鼓巡夜數
更鞞侵星出柳塞
際晚入榆溪秦涇含藥
鳩晉火逐飛鷄通泉開

地道望敵豎雲梯陰山日不暮長城風自淒弓寒折錦
韃馬凍滑斜蹄燕旗竿上脆羌笛管中嘶登山試下趙
憑軾且平齊當今函谷上惟用一丸泥

煌煌京洛行

欲知佳麗地為君陳帝京由來稱俠窟爭利復爭名鑄
銅門外馬刻石水中鯨黑龍過飲渭丹鳳俯臨城羣公
邀郭解天子問黃瓊詔幸平陽第騎指伏波營五侯同
拜爵七貴各垂纓衣風飄颻起車塵暗浪生舞見淮南

法歌聞齊后聲揮金留客坐饌玉待鐘鳴獨有文園客
偏嗟武騎輕

度關山

昔聽隴頭吟平居已流涕今上關山望長安樹如薺千
里非鄉邑四海皆兄弟軍中大體自相褒其間得意客
分曹博陵輕俠皆無位幽州重氣本多豪馬銜苜蓿葉劍
瑩鷗鷖膏初征心未習復值雁飛入山頭看月近草上知
風急笛鳴曲難成笳繁響還溢武帝初承平東伐復西征

薊門海作塹榆塞冰為城催令四校出倚望三邊平箭
服朝來動刀環臨陣鳴將軍一百戰都護五千兵且決雄
雌眼前利誰道功名身後事丈夫意氣本自然來時辭
第已聞天但令此身與命在不持烽火照甘泉

沈君攸

後梁人

薄暮動弦歌

柳谷向夕沈餘日蕙樓臨砌徙斜光金戶半入藂林影
蘭徑時移落蘂香絲繩玉壺傳綺席秦箏趙瑟

響高堂舞裙拂履喧珠珮歌響出扇繞塵梁雲邊雪飛
弦柱促留賓但須羅袖長日暮歌鍾恒不倦處處行樂
為時康

羽觴飛上苑

上路薄晚風塵合禁苑初春氣色華石徑斷絲闌蔓草
山流細沫擁浮花魚文熠燿含餘日鶴蓋低昂照落霞
隔樹銀鞍喧寶馬分衢玉軸動香車車馬處處盡成陰
班荆促席對芳林藤杯屢動情仍暢翠樽引滿趣彌深

山陽倒載非難得宜城醇醪促須斟半醉驪歌應可奏
上客莫慮擲黃金

鄧鏗

和陰梁州雜怨

暫別猶添恨何忍別經時叢桂頻銷葉庭樹幾攀枝君
言妾貌改妾畏君心移終須一相見併得兩相知

月夜閨中

閨中日已暮樓上月初華樹陰緣砌上窗影向牀斜開

惟傷隻鳳吹燈惜落花誰能當此夕獨處類倡家

王淑英妻劉氏

淑英瑯琊人妻劉氏繪之女孝綽之妹孝綽三妹並有才學一適王

淑英一適張
岫一適徐惟

昭君怨

一生竟何定萬事最難保丹青失舊儀玉匣成秋草想
妾辭關淚至今猶未燥漢使汝南還殷勤為人道

贈夫

妝鉛點黛拂輕紅鳴環動珮出房櫳看梅復看柳淚滿

春衫中

徐惟妻劉氏

答外

花庭麗景斜
蘭牖輕風度
落日更新妝
開簾對春樹
鳴鸝葉中舞
戲蝶花間驚
調琴本要歡
心愁不成趣
良會誠非遠
佳期今不遇
欲知幽怨多
春閨深且暮

題甘蕉葉示人

夕泣已非踈
夢啼太真數
惟當夜枕知
過此無人覺

木蘭詩

唧唧復唧唧木蘭當戶織不聞機杼聲惟聞女歎息問
女何所思問女何所憶女亦無所思女亦無所憶昨夜
見軍帖可汗大點兵軍書十二卷卷卷有爺名阿爺無
大兒木蘭無長兄願為市鞍馬從此替爺征東市買駿
馬西市買鞍韉南市買轡頭北市買長鞭朝辭爺孃去
暮宿黃河邊不聞爺孃喚女聲但聞黃河流水鳴濺濺
旦辭黃河去暮至黑山頭不聞爺孃喚女聲但聞燕山

胡騎聲啾啾萬里赴戎機關山度若飛朔氣傳金柝寒
光照鐵衣將軍百戰死壯士十年歸歸來見天子天子
坐明堂策勲十二轉賞賜百千彊可汗問所欲木蘭不
用尚書郎願馳千里足送兒還故鄉爺孃聞女來出郭
相扶將阿姊聞妹來當戶理紅妝小弟聞姊來磨刀霍
霍向豬羊開我東閣門坐我西間牀脫我戰時袍著我
舊時裳當窗理雲鬢對鏡帖花黃出門看火伴火伴始
驚惶同行十二年不知木蘭是女郎雄兔脚撲朔雌兔

眼迷離兩兔傍地走安能辨我是雄雌

石倉歷代詩選卷九